

Maajip 23-iat 2024

UPA2024/159

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 4/2023-mik Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa nunani avannarlerni efterskolit akornanni suleqatigiinnerup annertusineqarnissaanut periarfissat misissoqqullugit, tassungalu ilanngullugu atuartut efterskolimiinnermut aningaasanik qinnuteqateqarsinnaanissamut periarfissaat misissoqqullugit.

(Siunnersuuteqartoq: Aallartitat siulittaasuat Doris J Jensen)

Siumuminngaanniit Nunat Avannarliit Killiit efterskolersinnaanermut tunngasunut kaammattuutaannut apuussisumut, Doris J Jensenimut Siumumeersumut qujarusuppugut.

Siullertut NGK-mik aqqissuussaq oqaaseqarfigilaassavara, tassami Nordatlantisk Gymnasium, Sisimiuni GUX-ip suliniutigalugu angunikuusaa, taanna suleqatiserinninnermigut anguaa NGK Naalagaaffimmit aningaasalersugaanissaa, taamaalilluni nunat sisamaasut akornanni, Nunatsinnit, Dk-mit, Savalimmiunit aammalu Islandermiunit peqataaffigineqartoq, tassani ilinniarnertuunngorniat ukiuni pingasuni nunat taakku aqqusaarlugit ilinniarnertuut naammassisarmata, tassanilu ilinniarnertuunngorsimasut misigisaat pitsaasutut oqaatigineqarsinnaavoq. Pitsaassusaat eqqarsaatigalugu ilaatigut sakkortusinnaasartoq oqaluttuarineqarpoq, tassa matematiki sakkortulisamik aallaavigalugu teknikkinik sammivilinnik ilinniarnertuunngorniarfiummat. Periarfissarlu taanna torrallataasoq Siumuminngaanniit isumaqarpugut.

Nunat Avannarliit Killiit efterskolertitsisinnaanngornissaq, aqqissuussaq taamak isikkulittut ittumik, kisianni nunat taakku akunnerminni, periarfissaalersinnaanissaa kaammattuutigivaat. Nunatsinni efterskoleqarneq pitsaasutut isigivarput, tassami nunatta periarfissiissutai atorluarlugit sammisassaqtitsinerit ingerlanneqartarput. Kaammattuulli najoqqutaralugu periarfissiisinaalertuugutta kulturitta siammarterneqarnerulersinnaanissaanut periarfissinneqarneq ammaaffigisinaalissagaluarparput, tamannami nunarsuarmioqatitta ilaatigut aningaasarsiorfittut kisianni aamma ilataarnikkut, nunaminnut pingaartitsisuunerminnut siammarterinerinerminnut, atorluartarpaat. Nunatsinnilu tamanna massakkut aatsaat uukkalaartutut isigineqarsinnaavoq, taamaakkaluartorli ineriartupallakkiartuaartutut misinnarsinnaalluni.

Inuusuttuaqqat nunanut allanut aallarsinnaanissaat Siumumiit pingaarteqaarput, tassa meeqqat atuarfiannit naammasserlaat nunarsuarmut

aallartinneqarsinnaanissaannik periarfissaqartitsinerunissap tunngavigivaa, piffimmit aallarnej, allat inuusaasiannik misigisaqarneq, inuttut inerikkiartormik annertuumik malitseqartarmat, aammalu nunagisamut asanninnerulernermik kinguneqartarmat, assorsuaq una kaammattuut tapersernarpoq, naak Island efterskoleqanngikkaluaq ilimanarsinnaavoq aaqqissuussatigut periarfissiisinnaassasut.

Ilisimavarput Nunatsinni ilinnialertartut inersimasuukkajummata, politikikkullu anguniarneqarpoq inuusuttuaqqat ingerlariaqqissinnaanissaannut aqqutissiuussineq. Taamaammallu pisariaqarteqaagut inuusuttuaqqanut periarfissat pissanganartut, orniginartut aammalu nuannerunartut. Nunat Avannarliit Killiit suleqatigiinnermik inuusuttuaqqanik nunaminni atuartuuteqarsinnaanissaannut periarfisseerusunnerat ilalernartorujussuovoq, tassuunatigut kulturikkut, eqqarsartaatsikkut, anersaakkut aammalu inuttut ineriartorsinnaanerulernissaat aqqutissiuutissagatsigit, kisiannilu aamma efterskoleqarnerup Nunatsinni inerisaaffiginerulernissaa aammalu inuusuttuarartatta amerlanernik pitsaasunillu periarfissinnaalernissaat taamatut aqqutissiuunneqalissammat.

Ilisimavarpummi Majoriaqarfiit tamaani killilimmik ilinniartitsisinnaasut, imatut paasillugu, efterskolet periarfissaannik soqanngitsut, faaginik atuartitsineq kisimi periarfissaasoq.

Majorissallu inersimanerusunut aallartikkamik periarfissaanikuunera ilaatigut maanna meeqqat atuarfiinit naammasserlaat atuarfigisaleraluttuaraat paasissutissanit aaneqarsinnaavoq. Taamaattumillu efterskoleqarnikkut Danmarkuinnaq massakkut iseqartarneq ilaannit ornigineqarpiarneq ajortoq, ilimanarsinnaavoq imatut aaqqissuussinikkut kajungerneq annertunerulersinnaassasoq.

Taamatut oqaaseqarluta Nunat Avannarliit Killiit kaammattuutaat Siumumiit akuerivarput.

Najaaraq Møller
Siumut